



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ**  
**ԴԱՏԱԿԱՆ ԿԱԶՄԻ ՈՐՈՇՈՒՄ**

**ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ**

Քաղ. Երևան

27 ապրիլի 2026 թ.

Սահմանադրական դատարանի դատական կազմը՝

Նախագահությամբ՝

Ա. Վաղարշյանի

Անդամակցությամբ՝

Հ. Հովակիմյանի

Ա. Զեյնալյանի

Քննության առնելով Հասմիկ Հարությունյանի անհատական դիմումի  
ընդունելիության հարցը,

**Պ Ա Ր Զ Ե Ց .**

1. Հասմիկ Հարությունյանի (այսուհետ՝ Դիմող, ներկայացուցիչ՝ փաստաբան Արսեն Հովհաննիսյան) դիմումը Սահմանադրական դատարան է մուտքագրվել 2026 թվականի ապրիլի 7-ին:

Դիմողը Սահմանադրական դատարան ներկայացրած իր դիմումում խնդրել է.

«(...)

«Ա աշխատանքային օրենսգրքի 113-րդ հոդվածի 1-ին մասի 2-րդ կետը և «Ք քաղաքացիական դատավարության օրենսգրքի 214-րդ հոդվածի 3-րդ մասը, հաշվի առնելով իրավակիրառ պրակտիկայում այդ նորմերին տրված մեկնաբանությունը, ճանաչել «Ս սահմանադրության 79-րդ հոդվածի, ինչպես նաև 57-րդ հոդվածի 1-ին և 2-րդ մասերի պահանջներին հակասող և անվավեր՝ այնքանով, որքանով այդ մեկնաբանությամբ նորմերի կիրառմամբ թույլատրվում է աշխատանքային պայմանագրի լուծման իրավաչափությունը հիմնավորել օրենքով նախատեսված մի քանի հիմքերից միայն մեկի առկայությամբ՝ անտեսելով անհատական իրավական ակտում գործատուի կողմից ներկայացված հիմքերի ամբողջականությունը»:

2. Դիմողը, ներկայացնելով թիվ ԵԴ2/2720/02/24 քաղաքացիական գործի դատավարական նախապատմությունը, նշում է, որ «Ա աշխատանքային օրենսգրքի 113-րդ հոդվածի 1-ին մասի 2-րդ կետը կոչված է սահմանելու այն իրավական հիմքերը, որոնց առկայության պայմաններում գործատուն կարող է ձեռնարկել աշխատողի հետ աշխատանքային հարաբերության դադարեցում, մինչդեռ, «Ք քաղաքացիական դատավարության օրենսգրքի 214-րդ հոդվածի 3-րդ մասը վերաբերում է արդեն իսկ ընդունված անհատական ակտի օրինականության դատական գնահատման չափանիշներին: «Ետևաբար՝ ըստ Դիմողի՝ նշված նորմերը թեև կարող են գործնականում կիրառվել փոխկապակցված կերպով, այնուամենայնիվ, դրանք ունեն ինքնուրույն կարգավորման առարկա և տարբեր իրավական նշանակություն: Հավելելով՝ Դիմողը նշում է, որ խնդրո առարկա քաղաքացիական գործով «Ք դատարանների կողմից ձևավորված մոտեցումը հանգեցրել է նրան, որ վերոնշյալ նորմերը կիրառվել են ոչ թե իրենց ինքնուրույն բովանդակությամբ, այլ փոխկապակցված մեկնաբանությամբ, որի արդյունքում նյութաիրավական նորմի դիսպոզիցիան փաստացի վերափոխվել է դատավարական նորմի օգնությամբ:

Դիմողի պնդմամբ՝ «Ք դատարանները, հղում կատարելով նաև «Նորմատիվ իրավական ակտերի մասին» օրենքի 16-րդ հոդվածին, հանգել են հետևության առ այն, որ աշխատանքային պայմանագրի լուծման համար բավարար է «Ա աշխատանքային

օրենսգրքի 113-րդ հոդվածի 1-ին մասի 2-րդ կետում թվարկված հանգամանքներից թեկուզ մեկի առկայությունը, եթե այն դատարանի գնահատմամբ կարող է համարվել հաստատված: Դիմողը գտնում է, որ այս մոտեցմամբ փաստացի անտեսվել է այն հանգամանքը, թե գործատուն իր ընդունած անհատական իրավական ակտում ինչ ծավալով և ինչ կառուցվածքով է ձևակերպել աշխատանքային պայմանագրի լուծման համապատասխան հիմքերը: Մինչդեռ՝ ըստ Դիմողի՝ սույն գործի նյութերից հետևում է, որ ընկերությունը վիճարկվող անհատական ակտի հիմքում դրել է ոչ թե օրենքով նախատեսված հնարավոր հիմքերից որևէ մեկն առանձին վերցված, այլ միաժամանակ մի քանի փոխկապակցված հանգամանքներ՝ դրանք ներկայացնելով որպես աշխատանքային պայմանագրի լուծման միասնական և ամբողջական հիմնավորում: Ուստի՝ Դիմողը համոզված է, որ իրավաբանական գնահատման առարկան այլևս չի սահմանափակվում նրանով, թե արդյո՞ք օրենքը վերացական մակարդակում թույլատրում է նշված հանգամանքներից որևէ մեկի առկայությամբ լուծել աշխատանքային պայմանագիրը:

Դիմողը նաև նշում է, որ ՀՀ քաղաքացիական դատավարության օրենսգրքի 214-րդ հոդվածի 3-րդ մասն իր բնույթով չի կարող մեկնաբանվել այնպես, որ թույլ տա փոխել կամ վերասահմանել այն փաստական հիմքերի բովանդակությունը, որոնք գործատուն անձամբ դրել է իր անհատական իրավական ակտի հիմքում: Դիմողի պնդմամբ՝ նշված նորմի նպատակը դատական վերահսկողության չափանիշ սահմանելն է, այլ ոչ թե վիճարկվող անհատական ակտի փաստական կառուցվածքը վերափոխելը: Հետևաբար՝ Դիմողը գտնում է, որ այն պարագայում, երբ գործատուն իր որոշման հիմքում միաժամանակ դնում է մի քանի հանգամանքներ, դատարանի խնդիրը պետք է լինի ստուգել այդ ակտի իրավաչափությունն այն տեսքով, որով այն կայացվել է, այլ ոչ թե դրանից անջատել առանձին բաղադրիչ և միայն դրա հիման վրա մերժել հայցը:

Ըստ Դիմողի՝ մատնանշված քաղաքացիական գործով կիրառված մոտեցումը ցույց է տալիս, որ վիճարկվող նորմերին իրավակիրառ պրակտիկայում տրված մեկնաբանությամբ ընդլայնվել է տվյալ նորմերի կիրառման ծավալը՝ դուրս գալով

դրանց բնական և համակարգային ընկալման սահմաններից: Դիմողը գտնում է, որ անհատական իրավական ակտի հիմքում դրված բոլոր փաստական հանգամանքների ամբողջական ստուգման պահանջը փոխարինվել է դրանցից մեկի ընտրովի հաստատմամբ, որը, իր հերթին, էական ազդեցություն է ունեցել գործի ելքի վրա:

Արդյունքում՝ Դիմողը եզրահանգում է, որ վիճարկվող դրույթներին իրավակիրառ պրակտիկայում տրված մեկնաբանությունը հակասում է Սահմանադրության 79-րդ հոդվածով երաշխավորված՝ իրավական որոշակիության սկզբունքին, քանի որ խնդրո առարկա նորմերի կիրառումը դառնում է անկանխատեսելի և փոփոխական՝ կախված ոչ թե դրանց հստակ բովանդակությունից, այլ դրանց տրված մեկնաբանությունից: Միաժամանակ, Դիմողը գտնում է, որ վիճարկվող դրույթներին « դատարանների կողմից տրված մեկնաբանությունը հանգեցրել է իր՝ Սահմանադրության 57-րդ հոդվածի 2-րդ մասով երաշխավորված՝ աշխատանքից անհիմն ազատումից պաշտպանության իրավունքի սահմանափակման, քանի որ, եթե ընկերությունն իր ակտի հիմքում միաժամանակ դնում է մի քանի փոխկապակցված հանգամանքներ, ապա դրանց ամբողջությունն է կազմում իր ազատման հիմնավորումը, իսկ դրանցից յուրաքանչյուրի բացակայությունը պետք է ազդի այդ հիմնավորման ամբողջականության վրա: Այս առումով Դիմողը նաև նշում է, որ վիճարկվող դրույթներին իրավակիրառ պրակտիկայում տրված մեկնաբանությունը հակասում է Սահմանադրության 57-րդ հոդվածի 1-ին և 2-րդ մասերով երաշխավորված՝ աշխատանքի ազատ ընտրության և աշխատանքից անհիմն ազատումից պաշտպանության իրավունքի բովանդակությանը, քանի որ այն փաստացի հանգեցնում է նրան, որ գործատուի կողմից վկայակոչված՝ « աշխատանքային օրենսգրքի 113-րդ հոդվածի 1-ին մասի 2-րդ կետով նախատեսված հիմքերի ամբողջական գնահատումը փոխարինվում է դրանցից որևէ մեկի հաստատմամբ՝ « քաղաքացիական դատավարության օրենսգրքի 214-րդ հոդվածի 3-րդ մասի լայն մեկնաբանության արդյունքում:

3. Ելնելով դիմումի և դրան կից ներկայացված փաստաթղթերի ուսումնասիրության արդյունքներից, ինչպես նաև ղեկավարվելով «Սահմանադրական դատարանի մասին» սահմանադրական օրենքի (այսուհետ նաև՝ Սահմանադրական օրենք) 29 և 69-րդ հոդվածներով՝ Սահմանադրական դատարանի դատական կազմը գտնում է, որ սույն անհատական դիմումով գործի քննությունը **ենթակա է մերժման՝** հետևյալ պատճառաբանությամբ.

Սահմանադրության 169-րդ հոդվածի 1-ին մասի 8-րդ կետի համաձայն՝ Սահմանադրական դատարան կարող է դիմել յուրաքանչյուր ոք՝ կոնկրետ գործով, երբ առկա է դատարանի վերջնական ակտը, սպառվել են դատական պաշտպանության բոլոր միջոցները և վիճարկում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Սահմանադրական վերոհիշյալ նորմն իր ամրագրումն է ստացել նաև Սահմանադրական օրենքի 69-րդ հոդվածի 1-ին մասում: Հիշյալ դրույթը սահմանում է այն հիմքերը, որոնց միաժամանակյա առկայության պարագայում ֆիզիկական կամ իրավաբանական անձը կոնկրետ գործով անհատական դիմում կարող է ներկայացնել Սահմանադրական դատարան: Դրանք են՝

- ա) երբ կոնկրետ գործով առկա է դատարանի վերջնական ակտը,
- բ) երբ սպառվել են ներպետական դատական պաշտպանության բոլոր միջոցները,
- գ) երբ վիճարկվում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Սահմանադրական օրենքի 29-րդ հոդվածի 1-ին մասի 1-ին կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում, եթե դիմումում առաջադրված հարցերը ենթակա չեն Սահմանադրական դատարանին:

Սահմանադրական դատարանը 2009 թվականի մարտի 17-ի ՍԴԱՌ-21 աշխատակարգային որոշմամբ արձանագրել է, որ «(...) բոլոր այն դեպքերում, երբ դիմողը, ձևականորեն վիճարկելով օրենքի դրույթի սահմանադրականության հարց, ըստ էության բարձրացնում է այդ դրույթի կիրառման իրավաչափության հարց կամ հետապնդում է այլ նպատակներ, ապա այդպիսի դիմումները ենթակա են մերժման՝ (...) որպես սահմանադրական դատարանի քննության ենթակա հարց չառաջադրող դիմումներ»:

Այս առումով հարկ է փաստել, որ սահմանադրական կոնկրետ վերահսկողության առարկա կարող են դառնալ այնպիսի վեճեր, որոնց հիմքում դրված են ոչ թե կոնկրետ գործի փաստական և (կամ) իրավական հանգամանքների գնահատման, վիճարկվող իրավական նորմի տվյալ գործով կիրառման կամ չկիրառման, այլ՝ նորմատիվ իրավական ակտի վիճարկվող դրույթի սահմանադրականության գնահատման հարցեր:

Սույն գործի նյութերի ուսումնասիրությունը վկայում է, որ Դիմողը, ձևականորեն վիճարկելով ՀՀ աշխատանքային օրենսգրքի 113-րդ հոդվածի 1-ին մասի 2-րդ կետի և ՀՀ քաղաքացիական դատավարության օրենսգրքի 214-րդ հոդվածի 3-րդ մասի (իրավակիրառ պրակտիկայում դրանց տրված մեկնաբանության) սահմանադրականությունը, ըստ էության, բարձրացնում է տվյալ դրույթների կիրառման իրավաչափության հարց:

Այսպես՝ Դիմողը, ի թիվս այլնի, ներկայացրել է դիրքորոշում, համաձայն որի՝ «Սույն գործով, սակայն, դատարանների կողմից ձևավորված մոտեցումը հանգեցրել է այն բանին, որ նշված երկու նորմերը կիրառվել են ոչ թե իրենց ինքնուրույն բովանդակությամբ, այլ այնպիսի փոխկապակցված մեկնաբանությամբ, որի

արդյունքում նյութաիրավական նորմի դիսպոզիցիան փաստացի վերափոխվել է դատավարական նորմի օգնությամբ:

Մասնավորապես, դատարանները, հղում կատարելով նաև «Նորմատիվ իրավական ակտերի մասին» ՀՀ օրենքի 16-րդ հոդվածին, այնպիսի հետևության են հանգել, ըստ որի՝ աշխատանքային պայմանագրի լուծման համար բավարար է ՀՀ աշխատանքային օրենսգրքի 113-րդ հոդվածի 1-ին մասի 2-րդ կետում թվարկված հանգամանքներից թեկուզ մեկի առկայությունը, եթե այն դատարանի գնահատմամբ կարող է համարվել հաստատված: Այս մոտեցմամբ, փաստացի անտեսվել է այն հանգամանքը, թե գործատուն իր ընդունած անհատական իրավական ակտում ինչ ծավալով և ինչ կառուցվածքով է ձևակերպել աշխատանքային պայմանագրի լուծման տվյալ հիմքերը»:

Դիմողը նաև նշել է հետևյալը. «ՀՀ քաղաքացիական դատավարության օրենսգրքի 214-րդ հոդվածի 3-րդ մասը, իր բնույթով, չի կարող մեկնաբանվել այնպես, որ այն թույլ տա փոխել կամ վերասահմանել այն փաստական հիմքերի բովանդակությունը, որոնք գործատուն անձամբ դրել է իր անհատական իրավական ակտի հիմքում: Նշված նորմի նպատակը դատական վերահսկողության չափանիշ սահմանելն է, այլ ոչ թե վիճարկվող անհատական ակտի փաստական կառուցվածքը վերափոխելը: Հետևաբար, երբ գործատուն իր որոշման հիմքում դնում է միաժամանակ մի քանի հանգամանք, դատարանի խնդիրը պետք է լինի ստուգել այդ ակտի իրավաչափությունն այն տեսքով, որով այն կայացվել է, այլ ոչ թե դրանից անջատել առանձին բաղադրիչ և միայն դրա հիման վրա մերժել հայցը»:

Վերոշարադրյալի հաշվառմամբ, նկատի ունենալով նաև Դիմողի կողմից ներկայացված մյուս դիրքորոշումները՝ Սահմանադրական դատարանի դատական կազմը եզրակացնում է, որ վերջինս իր անհամաձայնությունն է հայտնում թիվ ԵԴ2/2720/02/24 քաղաքացիական գործով ՀՀ դատարանների կողմից կայացված դատական ակտերի բովանդակությանը: Մասնավորապես՝ Դիմողը վիճարկվող դրույթների (իրավակիրառ պրակտիկայում դրանց տրված մեկնաբանության) **հակասահմանադրականության որևէ հիմնավոր փաստարկ չի ներկայացնում**, իսկ

որպես փաստարկ ներկայացվող դիրքորոշումներն առավելապես վերաբերում են խնդրո առարկա քաղաքացիական գործով ՀՀ դատարանների գործողությունների (կայացրած դատական ակտերի) իրավաչափությանը, որի ստուգումը դուրս է Սահմանադրական դատարանի իրավասության շրջանակից:

Ուստի՝ հիմք ընդունելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 1-ին կետի պահանջը՝ սույն անհատական դիմումով գործի քննությունը Սահմանադրական դատարանի կողմից ենթակա է մերժման՝ դիմումում առաջադրված հարցի՝ Սահմանադրական դատարանին ենթակա չլինելու հիմքով:

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 1-ին կետով՝ Սահմանադրական դատարանի դատական կազմը

**Ո Ր Ո Շ Ե Ց .**

Հասմիկ Հարությունյանի անհատական դիմումով գործի քննությունը մերժել:

Նախագահող՝

Անդամներ՝



Ա. Վաղարշյան

Հ. Հովակիմյան

Ա. Զեյնալյան

27 ապրիլի 2026 թվականի  
ՍԴԴԿՈ-35